

Skupština Kantona Sarajevo

Admela Hodžić, zastupnica u Skupštini Kantona Sarajevo

Sarajevo, 19.04.2023. godine

Bosna i Hercegovina

Federacija Bosne i Hercegovine

Kanton Sarajevo

Skupština Kantona Sarajevo

Vlada Kantona Sarajevo

N/r predsjedavajućeg

ZASTUPNIČKA INICIJATIVA

Na osnovu čl. 106. i 213. Poslovnika Skupštine Kantona Sarajevo („Službene novine Kantona Sarajevo“, broj 41/12 - drugi novi prečišćeni tekst, 15/13, 47/13, 47/15, 48/16, 9/20, 14/20) podnosim inicijativu Vladi Kantona Sarajevo i Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo da u što skorije vrijeme poduzme sve potrebne aktivnosti i obezbijedi sve potrebne uvjete kako bi se izradila “Studija o opravdanosti izgradnje fabrike vode na području Kantona Sarajevo”.

OBRAZLOŽENJE

Na isti način kako je to urađeno za pokretanje projekta izgradnje peletare u KS za koju je bilo potrebno izraditi studiju opravdanosti za tu vrstu proizvodnje a u nadležnosti Ministarstva privrede KS, pokrećem ovu inicijativu prema Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo u čijoj nadležnosti bi trebala biti ova vrsta djelatnosti .

Nažalost, potrebno je uvijek da nam se desi neka kriza i rast cijena određenih energenata ili osnovnih životnih namirnica (na štetu građana) kako bi smo počeli koristiti resurse kao

odgovorni političari i menadžeri s vizijom i strategijom za stvaranje boljih uvjeta za život građana Kantona Sarajevo.

Nije nam ni potrebno novo poskupljenje vode da krenemo u ovom smjeru, dovoljno je samo da sagledamo realne činjenice, odnosno sredstva koja samo za vodu i razne napitke potroše iz Budžeta KS na godišnjem nivou sva ministarstva, javna preduzeća, javne ustanove, agencije, uredi itd.

Svaki put kada na red dođe izvještaj KJKP „Vodovod i kanalizacija“ d.o.o. Sarajevo, suočavamo se sa činjenicom kako su gubici vode u sistemu enormni kao i troškovi koji se moraju u buduće uračunati u cijenu vode kako bi gubici ovog komunalnog preduzeća bili umanjeni. Ovo je samo još jedan razlog više kako bi se enormni nedostaci prekomjernog broja zaposlenih i gubitak u vodovodnoj mreži mogli namiriti komercijalnom proizvodnjom i prodajom vode, te tako cijene vode građanima uvijek mogli držati stabilnim i čak dostupnim bez naknade za određene kategorije građana koji žive na rubu egzistencije. Barem 10 KM troškova vode mogli bi imati besplatno što je ujedno jedan humani čin cjelokupne zajednice. Često čujemo komentar naših sugrađana treće životne dobi s najnižim penzijama, koji kažu, da, kada plate račune i lijekove nemaju dovoljno novca za hranu. Besplatnu vodu za najugroženije kategorije građana možemo osigurati komercijalnom prodajom različitih pakovanja vode.

Razlog više je i što BiH uvozi četiri puta više pakovane pitke vode, nego što izvozi. U BiH se samo na godišnjem nivo uveze oko 150 miliona litara vode, ukupne vrijednosti oko 150 miliona maraka, dok je vrijednost izvezene vode bila oko 30 miliona. Prema popisu Agencije za sigurnost hrane, na tržištu BiH može se naći oko 50 različitih proizvođača vode, od čega je oko 30 domaćih.

Smatram da za proizvodnju i pakovanje vode imamo daleko bolje uvjete od pokretanja i same proizvodnje peleta pa zbog toga i pokrećem ovu inicijativu i smatram da se trebamo okrenuti pokretanju vlastite proizvodnje a ne otvaranju ureda koji automatski povlače za sobom i veće namete građanima jer se svaka plaća isplaćuje od nameta koji se stavljaju našim građanima na teret.

Fabrike za proizvodnju hrane i vode, te zadruga za otkup i garanciju za plasman proizvoda, pomoć pri pokretanju projekata obnovljivih izvora energije trebaju biti prioritet svake odgovorne politike i brige za građane.

Admela Hodžić